


sull- get














1615. 4.30348 g- fast in 12.

Pontre les Maintes qua fait fontre le gouvernement

ADVIS AVX

GENS DE BIEN.

M. DCXY.

(ase F 39 The NEW ERRY LIBRARY 16/6/5 adve M DUKA



A D V I S A V X GENS DE BIEN.

E v x qui ont dit que la mescognoissance n'estoit vne seule meschanceté, mais toute meschanceté, se sont mespris: La proximité, qui est de la con-

ception à la parole, les a abusez: Ils ont prins sans doute la mescognoissance au lieu de la mesdisance: Car pour exprimer la nature de toute execration, l'execration mesme, le Démon insernal, les Theologiens n'ont peu trouuer vn mot plus conuenable que celuy de calomniateur. Les Doctes aussi nous representent ce crime par les choses les plus horribles de toutes, le fer, le seu, le sort, la rage, & la morsure des Serpents. C'est un trenchant, disentils, qui entame & met en pieces les choses les plus compactes; vn seu qui surprend les

plus aduisez au plus prosond de leur repos, & les embrase premier que d'estre éueil-lez, aux ressentiments de cet accident su-neste: vn sort qui corrompt l'air le plus pur, abat & destruit les natures les plus vigoureuses, & change l'estat de santé le plus entier: vne rage non d'vn chien vulgaire, mais d'vn Cerbere infernal, dont la baue produit l'aconit, le poison le plus present & le plus mortel du genre humain: En sin vne morsure serpentine, mais non des serpents communs, ains d'vn aspie, dont la pointure insensible a plustost pourry tout le corps qu'on se soit apperceu de la piequeure.

Ce venin couué & fomenté dans les ordures d'vn esprit bas & sangeux s'écloss en deux sortes de monstres. Le premier éclate tout hault, tout ouvertement, & à toute outrance: Le second ne parle qu'à demy, en l'oreille, & à cachette: Le premier plus il fait veoir de rancune & d'animosité, moins il fait recognoistre de verité: Le second, plus il se pare d'amitié, de respect, ou de crainte, plus il persuade. Au premier, plus on en dit, moins on en croit: Au second, moins on en fait apperceuoir, plus on en fait conceuoir. Le premier s'attache 5

à toutes sortes de personnes, iusques au plus basses: Le second n'attaque principalement que les Grands & les Princes. Le premier partant est le moins redoutable: le second est non seulement calamiteux, mais tres-calamiteux; & dauantage, s'ilse peut trouuer quelque chose au dessus de la

supréme calamité.

Tout ainsi que tout le monde, quoy que non offencé, accourt contre vn serpent aussi tost qu'il se monstre, pour l'exterminer par toutes sortes d'armes, & les premieres qui viennent à la main; de mesme il faut qu'vn chacun coure sus à toute reste à ceste espece de monstre, pour l'estousser aussi tost qu'on le void poindre, pour l'horreur & la haine seule de la nature de son venin: & ce de tant plus lors qu'on void qu'il se respand sur les parties les plus nobles.

Mais dira quelqu'vn, la vengeance ne possede qu'vn esprit lasche, elle ne touche que les courages impuissants, les paroles ne blessent pas quand on les mesprise: elles n'offencent que lors qu'on s'en offence: Si on s'y veut arrester, on rencontrera tousiours l'Eptaphone de la ville d'Olympie; ou si vous voulez, l'Echo de Charanton, qui pour vn mot vous en redira sept & d'auantage: Celuya assez la vengeance qui l'a quand il luy plaist: Les plantes Royales, le Cumin & le Basilic croissent plus verdoyantes par les mauuaises & execrables paroles. Auguste (la gloire des grands Empereurs) s'est esleué par la clemence au dessus de la nature mortelle, pour monter aux sièges des Dieux. Le vilain Neron au contraire s'est rendu par la vengeance la honte & l'opprobre des Princes, & en sin l'ordure & l'abomination

du genre humain.

Il est vray, la calomnie est vn grand mal, qui ne s'appaise de paroles, il veut de plus puissants remedes. Le Cumin & le Basilie croissent bien tost, mais ils ne s'esleuent pas beaucoup hault, & ne durent guieres: les Grands ne peuuent estre attaints que par ceste poison. Achille n'estoit vulnetable que par vn endroit fort petit: Les Princes ne le sont que par cestuy-cy seul. Les Lions, dont la sierté genereuse espouvante les animaux qui donnent le plus de terreur, tremblent & se faschent de la voix offensiue d'vn petit coq. Il est vray, Auguste doit estre le patron des bons Princes, & Neron leur horreur: Mais en se moulant

fur Auguste, ils verront que comme le progrés & la fin de son Empire n'ont esté que douceur & benignité, que les commencemens en ont esté fort seucres : Il teignit pour s'établir (dit Seneque) toute la mer Acciatique du sang des Romains, & bannit vne bonne partie du reste. Au contraire, en detestant Neron, ils recognoistront que comme il finit son regne par toutes especes de cruautez, qu'il le commença par toutes sortes de clemence & de douceurs si extrémes, qu'estant contraint en ce temps de signer la mort de deux hommes, quoy que tres-scelerats, il se repentit (tant il estoit doucet alors) d'auoir apprins à escrire. D'autant que toutes sortes de vertus sont desirees en vn grand Prince, la seuerité estant du nombre, elle s'y doit trouuer en son temps & en son rang: Le regne d'vn Prince a ses saisons aussi bien que l'annee; de sorte que comme l'annee ne se peut passer sans tonnerre, aussi ne se peut vn regne sans quelque seuerité: Mais comme les tonnerres du Printemps sont de bon augure, parce qu'ils presagent que le reste de l'annee sera tranquille; aussi le cours d'vn regne est plus asseuré quand ses commencemens sont vn peu fermes & roides.

Il semblera possible que ce Discours vueille donner quelque soupçon de la grande douceur pratiquee pendant la minorité du Roy: Non, la regence de la Roine n'a peu estre trop indulgente; les remedes genereux ne se doiuent pratiquer que par l'ordonnance expresse du Medecin seul, ny appliquer que par les mains des Maistres: On ne doit vser attendant la venue du Medecin, que de remedes paliatifs. C'est au Roy seul au commencement de sa majorité à estre moins doux: Les fruicts qui en leurs commencemens ont vn peu d'aigreur, sont les plus doux en leur maturité.

Or si le Roy doit en ces commencemens faire paroistre quelque seuerité, il me semble que ce doit estre contre les calomniateurs. Les morsures veneneuses veu-lent le seu & le fer tout au commencement: si on s'y prend plus tatd, le mal se rend incurable, & ne fait-on plus lors que bourreler le corps, sans le pouvoir iamais sauver. De mesme si vn Prince laisse prendre racine au venin de la calomnie, & se couler insques dans le cœur de ses peuples, le mal est lors par-dessus le remede: De sorte que s'il le pense faire appliquer en ce

9

temps, il perdra le nom de Roy pour s'acquerir celuy de Tyran. Les vertus ne se treuuent iamais dans l'excés. Si la Clemence donnoit iusques à l'extremité, elle degenereroit de sa nature, pour se conuertir en stupidité ou lascheté de cœur. La vraye Religión reuere Dieu, mais la supersition l'ossence: La Clemence bien reglec aussi honore les Princes, mais si elle deuient démesuree, elle les rend contemptibles.

Ceste peste negligee en sa naissance, rendit premierement le Roy Henry III.mesprisable: puis poussant la haine dans l'ame de ses subjects, mit en fin la rage dans le cœur d'vn abominable Moine, & le parricide fer en sa main, pour en assassinant ce bon Roy, mettre toute la France au feu, au sang, & au pillage; & rendre ceste Roine des Prouinces, l'Esclaue des nations estrangeres: Ce bel œil de la terre, la partie la plus difforme de ce grand corps de l'vniuers. C'est elle mesme qui fit en fin que nostre grand Henry, l'amour de ses peuples, & la terreur des armees; cet admirable Guerrier, qui auoit passé le cours continuel de quelques trente années au trauers le peril des armes de plus de deux cent mille soldats, en cent quarante combats; celuy que la fureur mesme des canons n'auoit peu offencer en trente-cinq rencontres d'armees; trois batailles rangees, & plus de trois cents sieges de villes, fut en vn moment estaint, par vn traistre, piqué & essancé de ceste rage, lors qu'on le pensoit estre en vne pleine asseurance.

Les sots Phrygiens deviennent (quoy que bien tard) sages toutes sois à la parsin. Ferons-nous tousiours veoir que les François ne le peuvent iamais estre? Tous ceux qui sont auiourd'huy en aage de iugement, ont veu les seux des guerres ciuiles dernieres, & recognu que la calomnie seule les auoit alumez: Ils auoient tous protesté qu'ils ne se lairroient plus coiffer de pareilles bisses; neantmoins on sait iouer auiourdhuy tous les mesmes artisses, sans qu'ils les recognoissent: Est-ce qu'ils ne s'en ressouriennent plus, & que ce venin insensible leur aye desia stupessé le sens & la memoire?

Ils ont veu que lors que la France estoit toute storissante & en son plus grand sustre, on commença à se plaindre que tout estoit en desordre, que la consusson estoit en tous les Estats; qu'vn chacun ne faisoit que souspirer le malheur de son siecle:neantmoins que toute leur plus grande plainte estoit le luxe du temps, & qu'en ce faisant on ne se plaignoit que de trop d'aise, & d'vn trop bon ordre en l'Estat; veu que le luxe ne naist que d'vn exces de felicité, ceste felicité d'une bonne santé, en l'estat y acquise, & conseruee par la continuation d'vn bon & parfait gouvernement. Ne se peuuent-ils plus resouuenit que ceste espece de supréme calomnie commença à faire ses approches de bien loing & tout à couvert; se plaignant premierement d'vne mauuaise conduite en tout le general des ordres? Puis incontinant apres, ceste gangrene cheminant plus auant, pour n'auoir esté arrestec en son commencement, qu'elle se print aux Ministres de l'Estat, & aux plus sidelles & asseurez seruiteurs de sa Majesté, accusant les vns de ne seruir qu'à donner de pernicieux aduis, & les autres à tirer des mains du Roy la gresse du peuple ? En fin que ceste virulence s'attacha iusques aux deportemens les plus particuliers du Roy, le representant à ses subjects plus hideux & difforme en ses mœurs, que les Peintres ne font les malins Démons au peuple: D'où

s'ensuiuit tout aussi tost la haine, le mespris, la reuolte, & la mort pitoyable de ce

grand Prince.

Lors que la France aussi apres la cheute de son grand Henry, apres la perte de tout son appuy, se fut (cotre l'esperance de toute la preuoyance humaine, contre le cours de toutes minoritez Royales, & partant par vne conduite qu'on ne pourra iamais assez reuerer) maintenuë au plus hault poin& de sa felicité, & en vn doux & heureux repos, on commença à se plaindre que la confusion estoit en tous les ordres, chose facile à persuader au peuple, veu que l'abus en tous les Estats n'est d'aujourd'huy, mais depuis que les hommes sont hommes, chacun s'est tousiours plainct de son siecle, de sa condition, & de son aage: Il n'y a chose quelle qu'elle soit, qui n'aye beaucoup de defauts: Dieu seul est bon abfolument; chaque chose ne peut pas estre routes: La perfection de l'vniuers ne confiste qu'en l'ordre, & l'ordre en la diversité & inegalité. Il est non seulement vray qu'il n'y a personne qui soit sans vice, mais possible sans crime. Si l'offence qui est commise contre les biens ou l'honneur d'autruy est souvent pareille à celle qui est faicte contre la vie, qui est celuy qui ne soit au-moins vne sois en sa vie trébuché en quelqu'vne de ces trois, & partant qui ne soit criminel? Si tous les crimes estoient punis, les grands chemins ne seroient assez spacieux pour y planter des gibets: Il n'est donc pas expedient que tous les criminels soient chastiez, mais que le chastiement tombe sur quelques-vns, pour donner terreur aux autres, non que ceux qui reçoiuent la punition ne l'ayent meritee, mais parce que d'autres qui sont autant ou peut-estre plus coulpables en demeurent exempts.

Voyons maintenant ceste medaille par le reuers; Comme peu de gens se trouuent qui soient sans crime, aussi peu de personnes se trouueront sans quelque merite. Personne ne s'estime malhabille homme, vn chacun a bonne opinion de soy-mesme. Comme la punition est deuë au crime, le merite demande la recompence: Mais comme il n'est pas expedient que tout crime soit puny, aussi est-il impossible que tout merité soit bien recognu. Comme il n'y a personne qui puisse sibien ressentir la qualité de l'offence que celuy contre qui

elle est faicte, aussi n'y a il personne qui puisse mieux iuger ny recognoistre le merite que celuy duquel on a bien merité. Les biens sont deubs aux Roys par leurs subjects en beaucoup de petites parcelles, parce qu'ils proviennent de petites gens: Cesbiens par-apres sont deubs aux seruiteurs des Roys en plus grosses parties, parce qu'ils prouiennent des Roys & de personnes toutes magnifiques: De sorte que puis qu'il est necessaire de donner en gros ce qu'on a receu en détail, on ne peut donneràtous l'une des natures qui repugne à l'autre : ce qui est impliquer la contradi-&ion, que Dieu mesme ne peut ou plustost ne doibt exercer. Vous direz par-aduenture, au-moins doiuent-ils donner à ceux que tout le monde recognoist meriter le plus, & non souuent à ceux qui sont estimez d'vn chacun estre sans merites.

Sçachez que ceux qu'on pense le plus souvent meriter beaucoup, sont ceux ordinairement qui meritent fort peu ou point du tout. L'opinion du peuple est tousiours sotte; il faut seulement parler comme le peuple; li n'y a que le Maistre seul qui puisse bien iuger du merite de ses serui-

teurs: De sorte que celuy qui est le mieux recognu, doit estre estimé celuy qui a le mieux seruy, souuent par vne consideracion particuliere & cognue au Maistre seul. Ie diray encores plus; les hommes égaux en merites aupres des Roys, sont comme gettons d'vne mesme valeur en leurs mains: Quand il faut getter mille, celuy qui se trouue le plus pres des doigts est posé sur le comptoir pour ceste somme. Puis-que les Roys doiuent estre magnifiques, quand il faut qu'ils donnent, ceux qui se sont logez le plus pres de leurs cœurs, doiuent estre employez dans l'estat de leur magnificence, & non les autres: L'ordre du gect du monde & de tous estats bien policez le requiert ainsi: Dieu mesme ne dispense point autrement ses gracese C'est pourquoy les Princes, qui sont des Dieux visibles, ne doiuent ny ne peuuenc proceder autrement.

Le plus doux souspir en l'homme est celuy de la plainte: le plus visible leurre pour le reclamer est celuy-là mesme: Il se plaist naturellement en la plainte, parce qu'entre tous les animaux il est le plus desireux d'honneur & de louange: En le plaignant, ou se plaignant, on le louë, ou il se

louë: Car se plaindre, ou estre plaint, c'est dite ou ouir dire qu'on n'a pas le bien qu'on merite: Il se plaint, dy-ie, parce qu'il est le plus outrecuidé, & par consequent le plus ingrat de tous les animaux. ment ne se plaindroit-il de son Prince, puis qu'il se plaint de Dieu mesme ? Car ceste creature, faicte premierement de bouë, que son Createur neantmoins a mis au milieu de toutes les beatitudes pour participer à toutes : qu'il a fait intellectuelle, pour participer à la felicité des substances puremérintellectuelles: & corporele, pour se ressentir de celle des natures corporelles, ne laisse pour cela d'iniurier ceste toute Bonté, & de l'appeller marastre en son endroit: se plaignant de ce qu'elle la met au mode seule entre tous les animaux, toute nuë, sans armes, & sans industrie aucune; qu'elle luy donne vne vie plus courte que celle qu'elle a donnee aux corbeaux, aux cerfs & aux cheines meimes; & ceste vie encore subjecte à plus de maladies que n'est celle de rout le reste des animaux tous ensemble. En fin si Dieu la vouloit ouir en ses plaintes, elle lui porteroit des cayers qui en contiendroient dauantage que ceux que Messieurs des Estats ont presenté au

Roy; qui ont esté de telle consideration & simmenses, que la premiere Prouince, la mieux pollicee, celle qui reçoit le plus de graces de son Roy; en vn mot, qui a le moins d'occasion de se plaindre, a esté cel-

le qui en a donné le plus.

On faict plaindre le peuple à cause de la venalité des offices, pour ne luy donner à cognoistre qu'il y a certains defaux en la fragile conduite des hommes, qui ne peuuent receuoir de remede, & desquelles pour ceste raison on s'est plaint, & se plaindra on tousiours; tel qu'est cestuy cy: Car en quelque temps que ce soit, les charges publiques sont tousiours tombees soubs le commerce directement ou indirectement: Parce que en fair de delict, les voyes cachees sont detestables, puis qu'on ne peut retirer les hommes de ce trafic, la premiere voye doit estre toleree, pour oster l'occasion de se porter à la derniere. S'il est permis par vn droit commun à toutes les nations de vendre ce qu'on a achepté, on ne peut par le mesme droit vendre autrement qu'à decours ce qu'on a achepté de ceste sorte: en quoy il n'y peut auoir abus ny tromperie. Pendant l'Estat populaire des Romains, ceux qui desiroient estre promeuz aux offices, les briguoient par toutes sortes de moyens, dont on se peut seruir pour corrompre la liberté des suffrages d'vne Commune, iusques à les achepteren fin si publiquement & à beaux deniers comptans, qu'on vint à s'aider pour cet effect comme de trois sortes d'Officiers: les premiers appellez Interpretes, qui estoient ceux qui faisoient l'abouchement & le marché auec le peuple: Les seconds Sequestres, par deuers lesquels on consignoit les deniers dont on auoit conuenu: Et les derniers Divisores, qui les partageoient & distribuoient. L'Estat du depuis estant tombésoubs la puissance d'vn seul, les Empereurs pensant empescher telle venalité, la rendirent plus pernicieuse: Car comme ils refuserent de prendre argent des officiers, on eut recours aux Courtisans, & à ceux qui auoient plus de faueur en Cour:ce qui tomba en tel desordre, qu'à la fin les fauoris des Empereurs vendirent tout ouvertement leur faueur & recommandation: A quoy les Empereurs n'ayant peu remedier, & considerant le grand profit qui leur en pourroit venir, ils y prindrent part eux-meimes: De forte qu'il y eust en l'Empire Romain deux façons d'a-

chepter les offices: La premiere des Courtisans, qui s'appelloit Prinatum suffragium: & l'autre des Empereurs mesmes, appellee Dominicum suffragium. Quant aux mesmes offices qui estoient restez en l'election du peuple, ceux qui vouloient y paruenir s'obligeoient auparauant qu'en estre pourueuz, de faire quelque dons au public, ou representer quesques ieux & spectacles au' peuple, ou bien d'employer quelque somme d'argent aux affaires de la chose publique : lesquelles promesses appellecs en droit pollicitations, estoient approuuces & tenues pour obligatoires. En nostre France, auant qu'ils fussent perpetuels, ils estoient si publiquement venaux, qu'on les bailloit à ferme au plus offrant & dernier encherisseur: Ce qui a esté practiqué mesme par sain& Louys; pour les petits Bailliages subalternes, & ressortissans au grand Bailliage ou Seneschaussee de la prouince. Depuis qu'ils ont esté faits perpetuels, Louys XII. surnommé Pere du peuple, & que nous reclamons tant auiourd'huy, rendit le premier les offices perpetuels venaux, à l'imitation des sages Venitiens, lesquels ayant despensé plus de cinq millions de ducats à la guerre qu'ils

auoient contre luy, s'aduiserent pour remplir leur thresor tout espuisé, de vendre les offices de leur Republique: Par laquelle venalité la conscience ne peut estre interesse, attendu que sainct Thomas consulté sur ceste difficulté par vne Comtesse de Braban, a laissé par escrit en ses opuscules,

que ceste venalité est licite.

De quelque façon qu'on obtienne vn. office, par don ou par achapt, on n'y parvient point qu'apres l'information des vies & mœurs, & l'examen de la suffisance: De sorte qu'entre personnes égales en sçauoir & probité, le riche sans doute doit estre preferé au pauure, d'autant que le riche est moins aisé à corrompre que le pauure:Les plus fermes flechissent naturellement soubs le faix de la pauureté: Les plus foibles au contraire soustenus de l'appuy des richesses, ne peuuet que tres-mal-aisement estre ébranlez. D'ailleurs, il faudroit ou que le Roy choisist luy-mesme ses officiers, ou que ce fut les Grands de son Royaume, ou le peuple: La premiere procedure aigriroit le mal, au lieu de l'appaiser, & multiplieroit les plaintes au lieu de les abreger. Chacun a bonne opinion de son merite: En quelque sorte d'office que

ce soit, ils se trouueroient pour le moins cent personnes pour chacun; qui s'estimeroient tous aussi bien le meriter que celuy qui en seroit recognu le plus capable: Tellement que ce seroit par ce moyen offencer tous les autres, & leur donner tous les iours subject de mescontentement & de plainte. Si le Roy conferoit ces offices sur le choix des Grands ou du peuple, ceste voye n'apporteroit que des partialitez & des sedicions à la fin: Ce seroit remettre sus les Maires du Palais, & au lieu d'vn seul en establir eing cers: Ce seroit auoir no vn Roy mais seulemet vn premier Presidet au Royaume, qui n'auroit rien par-dessus ses Conseillers, que le nom & la preseance. Il se pratique toutesfois ainsi, direz-vous, en quelques Prouinces: Il ese vray, mais tous Estats ne se doiuent pas regir de mesme. La voye de l'election est contraire au repos de nostre Estat : Les Papes mesmes l'ont recognu ainsi aux prelatures & dignitez Ecclesiastiques de France: C'est pourquoy ils l'ont prohibee en ceste premiere prouince de la Chrestienté, pour le bien des consciences, & le repos des François. Les lis surpassent (dit Pline) toutes les autres fleurs en hauteur; aussi font les Roys de France tous les autres en authorité. Comme ils sont les premiers, ils doiuent seuls aussi estre vrayement Roys & vrayement grands. La grandeur absoluë des Roys de France ne se peut non-plus diminuer que la hauteur naturelle des lis s'abbaisser; la pensee seule en est detestable &

punissable, d'vn extréme supplice.

Il y a de l'abus aux finances, il est vray, parce qu'illest en tous Estats : S'il faut establir vne Chambre ardante ; il la faut establir non contre les financiers seuls; mais contre tous : Si nous y voulons penser, nous recognoistrons que le Paysan mesme fraude pius le Bourgeois son Maistre, que ne fait le financier son Prince. Il ya de l'abus aux finances, parce qu'il est trop vieil, c'està dire de tout temps, ou pour le mieux dire, de trop long vsage: C'est renouueller vne trop vieille querelle. Le Roy Philippes le Long establie (pour y mettre ordre) la Chambre des Comptes à Paris: neantmoins elle n'a pas empesché les abus. Le feu Roy en fit dresser vne autre, qu'on appelloit la Chambre ardante: Mais comme ce grand Prince eust (par la viuacité de son esprit)recognu en vn instant les consequences de telles recherches, il ne l'eust

pas plustost fait ériger qu'il la sit supprimer, quoy qu'on luy en sit esperer vn grand nombre de millions d'or. Les Estats de la France ayant autresois proposé cet expedient à Charles le Sage, pour recouurer argent, il le resus. Quelques Empereurs Romains proposerent des recompenses aux denonciateurs, mais d'autres mieux conseillez leur ordonnerent l'infamie & le fouer.

Sommes-nous si aueuglez par nostre propre malheur, que nous ne nous puis sions apperceuoir que les sinaces ne surent iamais mieux reglees, pour empescher l'abus qui s'y pourroit commettre, veu que rien ne s'y fait, rien ne s'y distribuë, qui ne passe par le Conseil, par le controlle, par le seau, & par la verification de la Chambre des Comptes Que s'il y pounoit auoir de l'abus, qu'il y seroit, parce qu'il y a esté & y sera tousiours: Car si tant de precautions ne pounoient retenir le désordre, rien ne le pourroit iamais empescher.

Nous-nous plaignons du luxe du temps, est-ce pas se plaindre de trop de selicité? Est-ce pas veoir qu'auiourdhuy le Paysan vit mieux que ne faisoit le Bourgeois aux siecles passez. Le Bourgeois mieux que le

B iiij

Gentilhomme: Le Gentilhomme que le Prince, & le Prince que le Roy mesme? Nous regrettons ces siecles passez, qui estoiet si pauvres, que le plus riche Prince. ne pouvoit pas tant donner à ses enfans, que fait à present le riche Bourgeois d'vne petite ville. Pourrions-nous supporter ces siecles du temps jadis, qui estoient si miserables, que le Bourgeois (comme il se voit par les ordonnances de Philippes le Bel) ne pouvoit non seulement porter or ny pierreries, mais mesme vn habit de riche teinture:ne pouvoit s'habiller que de drap à douze sols neuf deniers l'aulne, & sa femme d'vn à seize sols au plus; & ausquels il n'y auoit que les grandes Dames qui eufsent plus d'vne robe par an? Desirerionsnous vn siecle si sterile en toutes sortes de biens, qu'on ne pouvoit (ainsi parle ceste ordonnance du vieil temps) donner au grand manger plus de deux mets & vn potage au lard; sans fraude? On nous fait plaindre de l'imposition des tailles sur le pauure peuple, & on ne nous donne pas à entendre que saince Louys en est le premier Autheur. Nous disons que les tailles sont trop grandes, qu'eussions nous dit en ces vieux temps, que nous regrettons

soubs Louys le leune, qui print par an la vingtième partie du reuenu de son peuple? Soubs Charles V. surnommé le Sage, qui print la douzième? Soubs Philippes Auguste second du nom, qui print la dixiéme? Soubs le Roy Iean, qui print la dixiéme & demie, mesme sur les Nobles &gens d'Eglise: Et soubs Clotaire, qui leua la tierce partie des rentes & reuenus des Eglises? S'il y a du mal en ce que nous appellons luxe, c'est à dire en ce que nous estimons despence excessive aux meubles, aux viures & aux bastiments, ce mal ne regarde que quelques parriculiers; il n'importe qu'aux aisez, qu'il peut mettre quelquefois à mal-aise, pour accommoder tout le reste du peuple. Sont ce pas ces deux premieres especes de despences qui enrichisfent le Bourgeois, & le Marchand? Font viure à l'aise l'Artisant? Font mieux vendre les grains, les vins, & le bestail aux hommes des champs? échauffent par le lucre les hommes au trauail & aux inventions? Font seurir tous les arts, & meliorer la terre? Voyez s'il vous plaist la statuë à cheual en pierre, de Philippes le Bel, érigée dans l'Eglise Cathedrale de Paris; & celle en bronze du defunct Roy, posee sur le milieu

du Pont neuf, & vous recognoistrezbien tost l'inégalité de l'vn des siecles à l'autres la misere & pauureté de celuy que vous regrettez, & la felicité & richesses de l'autre, que vous rejettez. Il n'y a pas auiourdhuy vn poulce de terre qui ne soit en labeur, il ne se trouve plus de terres vaines & vagues: Neantmoins il y 2 (pour estre la France trop peuplee) vne infinité d'hommes de peine, qui pour n'auoir peu apprendre mestier, ne peuuent gagner leur vie qu'au seruice des armes, ou des bastimens; qui par le defaut de l'vne ou de l'autre de ces occupations, se font caymands, vagabonds, ou voleurs. Le premier employ est vn remede mille fois plus cruel que le mal mesme: Carla paix la plus inique, est mille fois plus à desirer que la plus iuste guerre du monde. On ne sçauroit donc trop bastir, c'est l'auantage des pauures gens. Iamais Prince (disent les mieux versez en l'histoire des temps) ne s'est rendu odieux pour ce subject : Il faut que ce qui 2 afflué iusques au Prince, refluë iusques à sa premiere source, de peur qu'elle ne tarisse. On se plaint des dons, neantmoins si on veut bien peser ceste plainte, on trouuera que le murmure seulement de la guerre a fait

plus de despence en trois mois, pour asseurer l'Estat, que les dons faicts pour le conseruer n'en ont apporté en quatre annecs. Autrefois on s'est plaint de ce qu'on n'auoit plus d'argent en France, parce qu'il estoit tout (ce disoit-on) dans la Bastille; auiourdhuy on se plaint de ce qu'on l'en retire. Est-il pas remis plus vtilement dans les bourses fidelles des subjects, que dans des coffres forts? Vaut-il pas mieux souffrir que les serviteurs du Roy le reçoiuent, que d'estre cause que les Suisses & les Vvalons l'emportent? Si la chaleur naturelle ne se respand iusques aux parties les plus extrémes du corps, & ne les fomente, elles se corrompent en teignes & demangeaisons, qui amaigrissent tout le corps, & l'inquietent: De mesme, si les bien-faits du Prince ne descendent iusques à la partie la plus basse du peuple, elle se gaste par faincantises, larrecins & brigandages, dont parapres tout le repos du reste de l'Estat est troublé.

Sommes nous pas laschement ingrats, ou bien plustost desia du tout insensez par ce poison? Pouvons-nous pas comprendre que comme en vn estat de santé debile, les bons Medecins ne changent iamais la

coustume de viure, mesme quoy que mauuaise? qu'ainsi en vn Estat tel que celuy. d'apresent il est trop dangereux d'y rien innouer? Que s'il falloit changer quelque chose, qu'il faudroit attendre vne disposition plus forte, & differer en vne autre saifon? Pouuons-nous pas recognoistre dans l'histoire, qu'encore qu'aucune minorité ne se soit iamais passee sans guerres, qu'vn tel Estatsoit de soy-mesme calamiteux, & si veritablement tel, que Dieu mesme le nous a ainsidit? Que l'Estat de la France soit le plus aisé à troubler, pour estre le François prompt & porte de son naturel aux changemens? Qu'entre toutes les minoritez qui ayent iamais esté en France, celle-cyfut la plus à redouter? Car le defunct Roy, apres auoir éueillé toute la Chrestienté à la guerre, auoit abandonné cet Estatsi soudain, qu'il n'auoit eu le loifir d'y mettre aucun ordre: Les Estrangers, ses ennemis, auoient les armes à la main: vne bonne partie des François s'ennuyant de la paix, estoit toute disposee à la brouillerie: l'autre estoit portee plustost à son interest particulier, qu'à la conservation de Tous en general estoient tellement abbatus de la douleur de leur perte,

estonnez d'aprehension, & assoiblis de peur, que les moindres remuements les eussent mis en déroute : Neantmoins la forte prudence de la Roine a non seulement retenu ce grand Estat, qui pour sa legereté naturelle, se sousseuoit de soy-mesme, & se laissoit emporter au premier vent: Maiselle l'a arresté ferme, contre les tourbillons les plus tempestueux. Elle a non seulement maintenu la France en la felicité en laquelle l'auoit laisse son grand Henry, mais elle l'a augmentee mesme; si la diminution des subsides, & la suppression de quelques quarante Edicts qui alloient à l'augmentation des finances du Roy, your peu apporter quelque accroissement. Bref, sa seule & toute admirable sagesse a fait ce que la conduite de tous les siecles n'a peu faire depuis qu'il y a eu des Royaumes au monde. Quel naturel donc, quel ressentiment, de luy apporter des plaintes sans nombre, au lieu de luy rendre des actions de graces infinies ? Quelle estime pourront faire de nous les nations estrangeres, quand elles considererons cecy? Qu'en pourront dire ceux qui viendront apres nous, quand ils le liront dans l'histoire?

Vous auez veu comme du temps du regne de Henry III.on disoit premierement, que toutes choses estoient en confusions; & par-apres, que ce Prince mettoit tout en profusions: Qu'il prodiguoit le merite du trauail de ses subjects à des personnes sans merites: Qu'il tiroit les sucurs & les larmes de son peuple, exprimces iusques au sang, pour satisfaire à la soif insatiable de ses fauoris: Qu'on attaquoit en apparence les mignons, mais qu'on en vouloit en estect à la personne du Roy: Que ceste peste, pour auoir esté mesprisee perdit en fin le Roy, pour penser perdre auec luy tout le Royaume. On vous presente auiourd'huy les mesmes leurres, & vous-y accourez. Vous voyez les mesmes piperies, & vous-vous en laissez dupper. Vous voyez qu'on vous veur mettre la haine dans l'ame, contre la Roine & les plus fidelles Ministres de l'Estat, pour vous faire prendre les armes en main, contre vous-mesmes. Il ne faut que changer les noms en ces mes chants petits libelles infamants, qui couroient du temps du Roy Henry III. mettre seulement au lieu de ceux de quelquesvns des mieux affectionnez seruiteurs de ce Prince, celuy de quelque seigneur

estranger, & vous verrez que ce sont ceuxlà mesmes dont vous-vous laissez seduire. Vous y verrez les mesmes calomnies, les mesmes plaintes, les mesmes paroles. Vous-vous estes apperceuz sur le tard, & apres vos malheurs, que ceux que le Roy Henry III. auoit auancez, auoient esté tres-meschamment calomniez. Vous pouuez dés à present voir, si vous voulez, & auant vostre misere (il vous importe de le considerer) que ceux d'auiourd'huy ne le

sont pas moins.

La calomnie nous dira, comme elle a fait soubs les regnes de Henry II, & Charles IX, que c'est mal fait de donner les gouvernemens & les principales charges du Royaume à vn estranger. Nous escoutons ces paroles, & nous ne recognoissons pas que ce sont blasphemes; puisque les loix punissent comme sacrileges ceux qui murmurent du choix que fait le Prince au subject de ses officiers. Les Romains, qui se sont acquis l'Empire du mode, par leurs braues & sages deportemens, n'ont iamais donné le gouvernement des Provinces à ceux du païs: ils recognoissoiet cette faute de si grande consequece, que par leurs loix ils ont declaré criminels de facrilege ceux

qui demanderoient telles charges en leur pays: Ces premiers hommes d'Estat iugerent que les originaires peuvent estre souuent distraits de la consideration du bien public, par le regard de l'affection des parentez, des alliaces & amitiez, ou inimitiez particulieres. Que ceux du pays preferent naturellement le bien de leurs compatriotes à celuy des estrangers; & quelquefois par erreur celuy du Prince mesme; & par ce moyen abusent de la Iustice qu'ils doiuent également à vn chacun: Au lieu que l'estranger, pour estre sans passion d'amitié ou de haine particuliere, pour n'auoir autre obligation qu'à Dieu, & au Prince qui l'enuoye, n'a occasion de se conduire que selon Dieu & le bien du seruice du maistre qui l'employe. Les ordonnances de France, dés le temps de Philippes le Bel & de Charles le Sage, sont conformes à ces sacrées constitutions: de sorte que nos Histoires tesmoignent que ce Charles estant seulemet regent, pendant la prison de lean son pere, cassa en presence des Estats conuoquez lors à Paris, mesme plusieurs Conseillers & Maistres des Comptes, seulemet pour estre du pais, & nez dans le ressort. Par-apres ce Prince aduisé, estant venu à 33

la Couronne, fit Bertrand du Guefelin, (tant fignale dans l'histoire, quoy que pauure Gentilhomme & estranger) non seulement Mareschal de France, mais Connestable. Et d'autant que ce Gentilhomme (pour auoir en ceste charge commani dement iusques sur les Princes du sang) craignoit, à cause qu'il estoit extraict de pauure noblesse les enuies, & de n'estre pas bien obey; le Roy luy fit entendre & l'asseura (dit l'histoire) qu'il n'auroit frère, neueu, cousin, ny autre qui ne luy rendie obeissance; & que celuy qui feroit autrement, s'apperceuroit de son courroux. Ce fage Prince aimoit si fort cest estranger, qu'il l'aima mesme apres son deces : De forte qu'il luy fit faire sa sepulture aux pieds de la sienne, en l'Eglise sain& Denis en France, laquelle s'y voir encores auiourd'huy. Si la ville de Rome (l'estendue de deux ou trois lieues au plus) estoit autrefois la patrie de tous les peuples; de sorte qu'on disoit lors qu'il n'y auoit en tout l'vnivers que les Barbares ou les Esclaves qui ne fussent pas Romains; Pourquoy som mes nous silasches: Pourquoy ne voulonsnous pas que la France, fauorable naturellement aux estrangers, ne se conferue cet

honneur que d'estre le pays commun à tous les gens de bien : & faire tousiours recognoistre qu'il n'y a que les meschans qui y puissent estrangers? Si tous les honnestes gens ont pour leur pays toutes les prouinces de la terre, par quelles raisons voulons-nous que la France n'y soit comprise? Voyons-nous pas mesme que les plantes transplatees sont les plus fructueuses? De tous les elemens il n'y a que ce peu de terre & de boue que nous foulons aux pieds, que nous puissions recognoistre pour nostre lieu natal; les autres nous sont communs auec le reste des hommes, & se changent en peu de temps: Car ce ne sont plus les mesmes caues, le mesme air, ny la mesme constellation qui estoient lors de nostrenaissance. N'enuions iamais la demeure des Estrangers en France, mais celle des François en tout autre pays que la France. C'est la marque de la felicité des provinces, quand elles attirent les Estrangers: C'est le surcroist de la grandeur des Princes, qui ne sont grands que pour commander aux hommes: Car plus ils ont de subjects, plus ils ont de puissances, de forces & de richesles.

Les Republiques des Atheniens & La-

cedemoniens rigoureules aux Estrangers ont esté de peu de duree: Au contraire, la France fauorable de tout temps à iceux, est l'Estat le plus ancien & le plus puissant de la Chrestienté, ausquels elle a non seulement par plusieurs fois & soubs divers Princes donné la charge de Mareschal de France, mais celle mesme de Connestable. Que diroit-on si elle commettoità present comme elle a fait autrefois & tousiours à son aduantage la conduite de ses armees aux Estrangers, à l'exemple des Venitiens & des Espagnols, peuples tenus pour les plus aduilez en fait d'Estat qui soient auiourd'huy en la Chrestienté? On se plaine de ce qu'on donne la garde de quelque place esloignee à vn seigneur Estranger, sans considerer qu'en France on confie la garde la plus proche de la propre personne du Roy aux Escossois & aux Suisses. Quelquegrand Politique a escrit qu'vn Prince quiredoute les factions ciniles, n'a meilleur moyen d'y remedier qu'en attirant en sa Cour vn nombre de Courtisans Estrangers, & en ayant quelques vns pour les plus confidents. La France donc, qui ne peut estre defaicte que par elle mesme, & ne doit craindre fa ruine que par vne guerre intestine, a besoin pour se maintenir de fauoriser beaucoup les Estragers: on compare le corps d'yn Estat à vn corps animé. Tout ainsi que nos corps se reparent & s'entretiennent par la mesme chose dont ils ont esté premierement formez, (car comme ils sont engendrez du sang, aussi sont ils cotinuellement nourris & restaurez par le sang) de mesme l'Estat des François sondé & estably premierement par les Estrangers a besoin continuellement d'Estrangers pour sa conservation.

Puisque nous voyos donc que toutes ces plaintes sont telles qu'elles ont esté ou peu estre faictes de tout temps, pendant les siecles les plus desirez, aux regnes les plus heureux; & soubs les Princes les plus recommandables, recognoissons que nous ne pouvons avoir assez de vehemence, d'indignation & d'horreur contre les Autheurs de ces meschas petits libelles de sedition; contre ceste peste & ce poison, qui seuls peuvent faire tuer les Roys, contre ceste rage qui échausse les peuples à la fureur, & leur fait courir les champs en foule & corps d'armees, pour se defaire eux mes mes. Huons ces hiboux & oyleaux funestes, qui par leur ery malencontreux reueillent & font tressaillir toute la France en son plus doux repos: Que tous les oyseaux du jour facent tant à coups de bec & de cris, d'execrations & de maledictions, que ces chat-huas nocturnes se recachent d'effroy si auant dans les tenebres & dans la nui& du silence, qu'ils ne puissent iamais retrouuer la lumiere ny le iour. Courons sus à ces boute-feux qui le portent dans le Louure, pour apres le faire volet en tous les endroits de la France. Demandons la vengeance de la mort de nos Roys sur la calomnie, puisque nous voyons que c'est vrayement elle qui les a meschamment affassinez. Crions & disons tout hault que Messieurs des Estats n'ont peu faire vne plus iuste demande en leurs cayers que celle de ceste punition : que l'article qui la contiendra demandera la reformation du plus grand & plus pernicieux abus qui soit en l'Estat. Representons-nous que les mesmes plaintes que l'on faict auiourdhuy se pouuoient faire du temps du desfun & Roy; que le blasme qu'on veut donner au gouvernement present, va contre l'honneur de la memoire de ce grand Prince, que tous les peuples honorent: & pource remonstrons tres-humblement à sa Ma-

jesté qu'elle ne peut estre assez rigoureuse contre le crime qui comprend tous les autres en soy, qui tend à dissiper l'honneur des cendres glorieuses de son Pere, met au hazard l'Estat, en proye les biens, & au sang la vie, en fin en trouble toute la Chrestiente. On puniroit l'autheur d'vn libelle infamant contre vn chetif crocheneur: Ceux qui prestent l'aureille à la ca-Iomnie sont iugezautat coulpables que le calomniateur. Ceux qui se trouvent sailis d'vn libelle fameux contre vn particulier, quel qu'il soit, sont punissables comme les autheurs mesmes: Neantmoins on tolero que ceux qui tendent à la sedition & seduction de tout le peuple, qui sont contre les sacrees personnes du Roy, de la Roine, & des plus fidelles Ministres de l'Estar, se vendent publiquement. Si nous receyons donc du mal, accusons-nous nous melmes, comme vrays authours & leuls coulpables, par la tolerance de ce crime de nos propres malheurs.

Time Dominum, filimi, & Regem: & cum detractoribus non commistearis: Quoniam repente consurget perditio corum. Prouceb. 24.

